



DECRETUM.

---

ROMANA SEU MECHLINIEN.

CANONIZATIONIS

BEATI IOANNIS BERCHMANS

CONFESSORIS

SCHOLASTICI E SOCIETATE JESU.

---

*Super dubio:* "An, et de quibus miraculis constet in casu et ad effectum de quo agitur?,"

---

**M**IRIFICIS naturae et gratiae ornata donis placita erat Deo anima Joannis Berchmans: propterea properavit illum educere ad requiem sempiternae beatitudinis, cui jam maturus erat post brevem quidem, sed evangelicae perfectionis merito plenum innocentis vitae cursum, idibus augusti anni MDCXXI in eodem romano collegio absolutum, quod simillimis angelici Aloisii exemplis fuerat nobilitatum. Illum heroicis virtutibus et miraculis fulgentem sa. me. Pius IX Pontifex Maximus V Kalendas junii anni MDCCCLXV beatorum coelitem honoribus decoravit. Quum autem beatus juvenis praesertim in natalibus Bel-



gii regionibus novorum subinde claresceret signorum fama; de his per processuales tabulas inita est inquisitio, postquam idem sa. me. Summus Pontifex commissionem re assumptionis Causae obsignasset. Hinc ut ex novis quae nunciabantur miraculis via sterneretur ad Canonizationem de duobus in sacrorum Rituum Congregatione ad severos pontificii juris tramites disceptatio habita fuit, primo apud clarae memoriae Card. Dominicum Bartolini eidem Sacrae Congregationi Praefectum et Causae Relatorem, III Kal. januarii anni MDCCCLXXXVI; iterata deinceps in Palatio Apostolico Vaticano XI Kal. Aprilis vertentis anni MDCCCLXXXVII ante Rmos. Cardinales sacris tuendis Ritibus praepositos, et absoluta XI Kal. julii ejusdem anni item in Vaticano Palatio in generalibus Comitibus coram Sanctissimo Domino nostro Leone Papa XIII; in quibus proposito a memorato cl. me. Cardinali Relatore dubio: "An, et de quibus miraculis constet in casu, et ad effectum de quo agitur?"; Rmi. Cardinales et Patres Consultores ex ordine suffragium dederunt.

Singulis studiose auditis, Beatissimus Pater supremam sententiam suam differre arbitratus est juxta Summorum Pontificum consuetudinem, ut interea humilibus precibus hac de re Deus exoraretur, qui non modo in Servis suis virtutes gignit, verum etiam de eorum in Ecclesia sua honoribus singulari providentia disponit.

In hac autem Omnium Sanctorum solemnitate,

Sacro piissime peracto, ad Vaticani nobiliorem Aulam ad se vocavit Rmum. Cardinalem Angelum Bianchi Sacrorum Rituum Congregationi Praefectum Causaeque Relatorem, nec non R. P. Augustinum Caprara S. Fidei Promotorem, et me infrascriptum Secretarium, iisque adstantibus, solemniter pronunciavit: "Constare de duobus Miraculis Beato Joanne Berchmans intercessore a Deo patrat; nimirum de primo: instantanae perfectaeque sanationis Mariae Wilson novitiae in tyrocinio virginum a sanctissimo Corde Jesu oppidi Grand Côtéau Archidioecesis Neo-Aurelianensis a lethali ulcere chronico stomachi, accedente acuta phlogosi, cui prope moriturae beatus Joannes apparens illico perfectam valetudinem restituit: ac de altero: Instantanae perfectaeque sanationis, Mariae Dionyssiae Lyon monialis professae in Bruxellensi Monasterio Clarissarum a gastrite chronica, ulcere stomachi peredente, et gravissima spinae laesione.

Praesens decretum in acta ejusdem Sacrae Congregationis referri, et publicari mandavit Kalendis Novembris anni MDCCCXXXVII.

A. CARDINALIS BIANCHI, S. R. C. *Praefectus.*

L. ✠ S.

*Laurentius Salvati*, S. R. C. Secretarius.





DECRETUM.

ROMANA SEU MECHLINIEN.

CANONIZATIONIS

BEATI IOANNIS BERCHMANS

CONFESORIS

SCHOLASTICI E SOCIETATE JESU.

*Super dubio*: "An Stante approbatione duorum miraculorum post indultam a Sede Apostolica eidem Beato venerationem, tuto procedi possit ad solemnem ejusdem Canonizationem?,"

**I**N tanta hodie juventutis corruptione illud singulariter delectat bonorum animos, quod Beatus adolescens Joannes Berchmans Societatis lumen et ornamentum ad Sanctorum cum Christo regnantium cultum in Ecclesia promovendus proponitur. Hic Stanislai et Aloisii exempla imitatus, pariter cum eis attigit virtutis fastigium, ideoque divino portentorum splendore redimitus, a s. m. Pio XI Pontifice Maximo beatorum Coelitum honoribus decoratus fuit, anno hujus saeculi sexagesimo quinto, die vigesima octava mensis maji, Ex



novis deinde quibus coruscavit miraculis duo, utpote caeteris clariora, ad Sacrae Rituum Congregationis examen delata sunt, et tandem Apostolicae Auctoritatis comprobata decreto Kalendis vertentis mensis et anni. Hisce sic stantibus, re delata ad Generalem Congregationem convocatam XVII Kalendas Decembris currentis anni in Aedibus Vaticanis coram Sanctissimo Domino Nostro Leone Papa XIII, ibi Rmus. Cardinalis Angelus Bianchi eidem sacrae Rituum Congregationi Praefectus, et Causae hujus Relator proposuit dubium: "An stante approbatione duorum miraculorum post indultam a Sede Apostolica Beato Joanni Berchmans venerationem, tuto procedi possit ad solemnem ejus Canonizationem?," Et singuli Rmi. Cardinales et Patres Consultores in affirmativam convenerunt sententiam.

Santissimus vero Pater postquam specialem divinum lumen a Deo ad hoc imploravit, Dominicam hanc primam Sacri Adventus elegit ad gravissimum judicium absolvendum. Ascersito igitur ad Vaticani nobilem aulam Rmo. Cardinali Angelo Bianchi Sacrae Congregationi praefecto et Causae Relatore, una cum R. P. Augustino Caprara Sanctae Fidei Promotore, et me infrascripto Secretario, iis adstantibus decrevit: Tuto procedi posse ad solemnem Beati Joannis Berchmans Canonizationem.

Decretum istud publicari, et in acta Sacrae Rituum Congregationis referri, Litterasque Aposto-

licas sub plumbo de Canonizatione quodcumque celebranda expediri jussit, V Kalendas Decembris anni MDCCCLXXXVII.


A. CARDINALIS BIANCHI, S. R. C. *Praefectus.*

L. ✠ S.

*Laurentius Salvati*, S. R. C. Secretarius.

A. M. D. G.





18

